

Date – 15/09/2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

1. Kawng chhe siamna tur pawisa sorkarin a neih thu PWD Minister Pu Vanlalhlana'n a sawi.
2. Vawk pul hrileng (ASF) chuan ziaawm lam a pan ve hret hret nia hriat a ni.
3. National Legal Services Authority-in ram puma National Lok Adalat buatsaih tura a tih angin nimin khan Lunglei leh Serchhipah buatsaih a ni.
4. Uttar Pradesh-ah ruah sur leh tuikhuah ațanga tui chhuah vangin hmun hrang hrangah lui a lian mek.

<><><>

PWD MINISTER

Public Works Department (PWD) changtu Minister Pu Vanlalhlana chuan Aizawl khawpui chung leh pawn kawng chhia te chu ruahtui tlak loh hunah siam that hna thawh a ni dawn a, kawng chhe siamna tur pawisa sorkarin a nei, a ti.

Minister chuan Mizoram hmun hrang hranga kawngpui chhia te chu siam duh mah se ruahtui a tlak reng avangin siam mai theih a nih loh thu a sawi a. Ruahtui a tlak loh hunah kawng siam hna an tan dawn, a ti a. Sorkar chuan pawisa ngah viau lo mah se kawng chhe zual lai siam thatna tur pawisa chu an nei tih sawiin, kawng chhe siam that hlan an nghakhlel hle tih a sawi bawk.

Ruahtui la tuihul chiah lo mah se Aizawl khawpui chung kawng chhe zual lai siam mek a nih thu sawiin PWD Minister chuan, tunlai hian kawng khuar chhe zual laite boulder hmanga hnawh a ni a, a tahtawla siam chhoh mek a ni, a ti a. Hetih lai hian Alkatra nena kawng siam chu an la ngam rih lo a, Alkatra nena kawng an siam hnu lawkah ruah a rawn s̄ur leh thin a, an kawng siamte a chhe leh nghal mai zel, a ti a. Tun ang khuaa alkatra nena kawng siam chu sum khawhralna mai a nih avangin an duh rih loh thu a sawi a ni.

Minister chuan Cyclone Remal avangin kuminah kawng a chhe nasa hle, a ti a. Mizoram chungah PWD enkawl loh kawng tam tak a awm thu sawiin, NHIDCL leh BRTF-in an enkawl mek eng emaw zat a awm, a ti a. Chutihruah erawh chuan Mizoram chung a nih avangin a that theihna atan theihtawp an chhuah tih sawiin, NHIDCL leh BRTF hotute an nawr reng thu a sawi bawk.

<><><>

ASF

Animal Husbandry & Veterinary Department chhinchhiah danin, kumin January thla atanga nimin thleng khan vawk pul hri (African Swine Fever) vangin Mizoramah vawk 12,510 an thi tawh.

Vawk pul hri hian khaw hrang hrang 236 nghawng tawhin ASF vanga vawk suat hi kumin chhungin 21,561 an tling tawh a, tun hnaiah hrleng hian ziaawm lam a pan ve hret hret nia hriat a ni.

Sorkar chuan vawk pul hri leng hi a buaipui zel a, tun hnai khan AH & Vety Minister Pu C. Lalsawivunga chuan sorkar laipui hnenah ASF damdawi rang taka siam emaw, ram dang atanga a lakluh dan kawng emaw dap turin a lo ngen tawh a ni.

Sorkar laipuaia Ministry of Animal Husbandry & Dairying-in Odisha-a AH & Vety Minister-te intawhkhawm a buatsaihah Minister Pu C. Lalsawivunga pawh telin ASF-in Mizoram a tuam avanga a tawrh nasatzia te, ran vulhtute chhawmdawl an ngaih thu te sawiin sorkar laipui chu hma laksak turin a ngen a. Hri leng awm thar tur ven leh hriselna kawnga India sorkarin chak taka hma a laknaah Mizoram sorkar pawhin theihtawp a lo chhuah ve mek thu leh a chhuah zel tur thu a sawi a ni.

<><><>

NATIONAL LOK ADALAT AT LUNGLEI & SERCHHIP

National Legal Services Authority-in ram puma National Lok Adalat buatsaih tura a tih angin nimin khan Lunglei leh Serchhipah buatsaih a ni.

Lunglei District Legal Services Authority chuan District Court Building Lungleiah National Lok Adalat hi a buatsaih a. Lunglei District huam chhunga court la thlenpui loh thubuai hrang hrang bakah mimal thubuai chi hrang hrang 118 ngaihtuah a ni a. Thubuai ngaihtuah tur hian Bench pahnih buatsaih niin Lunglei Chief Judicial Magistrate, District Legal Services Authority Secretary ni bawk Pi Lalthansiami Hnamte leh Judicial Magistrate First Class Pu Lalbiakmuana'n ten an kaihruai a. Thubuai hrang hrang theh luh atangin thubuai 60 tihfel a ni a. Thubuai ngaihtuahah hian leiba inthinna a tam ber a, chanchin buatsaih lai hian Cheng Nuai 64, Sing 9 Sang 3 leh 304 hu chin fel a ni.

Nimin vek khan Serchhip District Legal Services Authority pawhin District Court, Serchhipah National Lok Adalat an buatsaih a, Cheng Nuai 57 Sing 4 leh 201 hu thubuai chinfel a ni.

Serchhipa National Lok Adalat hi Pu R. Malsawmdawngzuala, MJS leh Pi Zosangzeli Tlau, MJS ten bench pahnihah an kaihruai a. Serchhip district chhung atanga thubuai chi hrang hrang 64 lut zinga thubuai 28 chinfel a ni.

<><><>

ADVISER TO CHIEF MINISTER

Adviser to Chief Minister Dr. Lorrain Lalpeklia Chinzah, Lawngtlai East Bialtu MLA chuan sawrkarin ai kal titawp turin theih tawp a chhuah mek, a ti.

Zirtawpnia District Project Office, Samagra Shiksha, Lawngtlai a tlawhnaah Dr. Lorrain Lalpeklia Chinzah chuan he thu hi sawiin aikal titawp tura sorkar hmalakna chuan ram leh hnam tana nghawng tha zawk a

thlen ngei a beisei thu a sawi a. Rinawmna a pawimawh tih sawiin eng hna pawh rinawm taka thawh a nih chuan malsawmna a keng tel thin a ti.

Lawngtlai East bialtu MLA chuan District Project Office, Samagra Shiksha, Lawngtlai thawktute chu rinawmna leh taihmakna nena an hna thawk thin turin a fuih a. Lehkha thiam zawng tehna, literacy rate-ah Lawngtlai district- a hnufual thin hle chu veiawm a tih thu sawiin zirthiamna kawnga theihtawp chhuah chhonzawm zel tur leh a tul anga hma la thin turin District Project Coordinator leh a thawhpuite a sawm a ni.

Adviser to Chief Minister Dr. Lorrain Lalpeklana Chinzah hian Government Southern Standard Middle School leh Government College Veng High School, Lawngtlai te a tlawh nghal bawh.

<><><>

YLA

Lawngtlai Bethel Veng Branch YLA chuan Young Lai Association Golden Jubilee lawmna pualin khawsak harsa te in an saksak.

Young Lai Association Golden Jubilee lawmna pual hian Bethel Veng Branch YLA te chuan khawtlang huap hnatlang an ko a. An veng chhunga khawsak harsa, mahni in sa thei lo engemawzat in saksakin mi 100 bawh hnatlangah hian an thawk chhuak a ni.

Young Lai Association Golden Jubilee hi kumin kumtir atang khan intihsiakna hrang hrang hmangin lawm chhoh a ni a. Vantlang tana thil tha tih nan Golden Jubilee lawmna hi kalpui mek niin a lawmna pui ber chu November ni 19 atanga ni 21-ah neih tum a ni.

<><><>

BAILEY BRIDGE COLLAPSED

Mizoram leh Assam inkalpawhna pakhat Saiphai – Bagha road-a Lei chu Zirtawp zan khan truck-in an zawh chim.

Lei chimna hmun hi Mizoram atanga Bagha bazar thlen hma, Assam lam huam chhunga awm a ni a. Truck pahnihin Lei hi a ruala zawhin hei hian a chimpui ta nia thu dawn a ni.

Lei hi Serkhan – Bagha road atanga Assam leh Mizoram inkalpawhna pawimawh tak niin, lirthei veivak bakah motor lianin an zawh ber thin a ni.

<><><>

SWACHHATA HI SEVA 2024 CAMPAIGN AT MAMIT

Ram pum huapa faina beihpui thlakna, Swachhata Hi Seva 2024 chungchanga Mamit district mipuite ngenna Mamit Bawrhsap Pu Jacob Lalawmpuia'n nimin khan a tichhuak.

Bawrhsap chuan faina chu changkanna atana kailawn pawimawh tak a nih avangin mi tinin an tih theih leh an mawhphurhna a nih angin mimal, chhungkua, veng leh khaw tinte theihtawp chhuaha hma la turin a sawm a. A paihna tur lova bawlhhlawh paihin ram leilung thlengin nghawng pawh tak a nei thei tih sawiin bawlhhlawh paih turah tawih thei leh thei lo thliar fel a pawimawh hle, a ti a. Hapta hman chhung hian Department tinte leh khawtlang hruaitute'n uluk lehzuala mipuite zirtir leh kawhhamuh a tul a ni, a ti a. Hawhtling taka Campaign kalpui a nih theih nan neitu thinlung pua thawhhopuia District mipuite a sawm a ni.

Thuchhuaha tarlan dan chuan he faina campaign kalpui tur hian Nodal Officer pahnih - Urban-ah PHE Senior EE Pi Helen Saibuangpuii leh Rural-ah

Mamit DUDO Pi Mary L. Rodinpuii te ruat an ni a. State sawrkarin ruahmanna a siam tawh angin tun thla ni 17 atanga thla thar ni 2 thleng campaign hi kalpui tur a ni a. Hemi chung hian Department hotu te, Sub-Division, Block leh Village Council tin te an huamchung theuhah uar zawka kalpui tura ngen an ni.

<><><>

UP FLOOD

Uttar Pradesh-ah chuan ni eng emaw zat kalta chungah ruah sur leh tuikhuah atanga tui chhuah vangin hmun hrang hrangah Ganga, Yamuna, Ghaghra, Sharda, Ken, leh Chambal luite chu hlauhawm khawpin a lian tawh a. Tunah hian Badaun-a Ganga lui, Banda-a Ken lui leh Dhaulpur-a Chambal lui chu hlauhawm chin an tehna aia sangin a lian tawh a. Hetih lai hian Farrukhabad-a Ganga lui, Lakhimpur-a Sharda lui leh Balrampur-a Rapti lui te pawh hlauhawm khawpin a lian tep tawh a ni. Hei bakah hian Bijnor Barrage atanga tui chhuak avangin Amroha district-ah Ganga lui a luang nasa hle a, Prayagraj-ah chuan Ganga-Yamuna tui level chu a sang chho chak hle bawk. Sangam area-a tui a san chhoh zel avangin tuilianin a tuarna hmun zawng zawngah water police dah vek tawh a ni. State chungah district 11-a khaw eng emaw zat chuan tuilian an tuar mek a, Uttar Pradesh-a tuilianin a nghawng district-ah hian NDRF, SDRF, leh PAC atangin team 73 dah an ni tawh a ni.

<><><>